

TORITENY - ALAHADY faha-33 TSOTRA - TAONA D



HO AVY NY FARANDRO ARY HOTSARAIN'ANDRIAMANITRA ISIKA

Ry Kristianina havana, tamin'ny Alahady lasa teo isika dia nandinika bebe kokoa ny fitsanganan-ko velona ary matoky isika fa arakaraky ny fieretretantsika ny hoavy sy ny fiheverantsika ny fahafatesana no hamolavolantsika ny fiainantsika andavanandro.

Raha ny fihevit'izao tontolo izao no entintsika mamaritra ny fiainan-koavy izany hoe ny fiafarana, ny

fahalevonana dia tsy mahagaga raha manarotra ity fiainantsika ity hanaovana ny rendrarendra rehetra. Ny fahendren'izao tontolo izao no mibaiko ny fiainantsika ka mahatonga ny fahafatesana manjaka amin'izao androntsika izao: ny herisetra, ny fitapitaka, ny lainga, ny herin'ny haizina izay manapotika ny aina ka ny

Vakiteny I : *Mal. 3, 19-20a*

Salamo : *Sal. 97*

Vakiteny II : *2 Tes. 3, 7-12*

Evanjely : *Lk. 21, 5-19*

fahafatesana no eo anivon'ny fiainantsika. Vantany vao mihaino radio isika na mamaky gazety na mijery fahitalavitra dia mahatsapa isika fa fahafatesana no hita matetika satria ny fahendren'izao tontolo izao no andrafetana ny fiainantsika.

Raha ny fiainan-koavy no heverintsika dia ny hasambarana izay misy ireo olomasina sy ireo

havantsika efa nialoha làlana atsika izay ohatra velona ho antsika no hiezhantsika hivelomana. Ary araky ny fampianaran'ny Eglizy dia izay ny mahatonga atsika mivavaka ho azy ireo amin'izao volana novambra izao. Isaorana isika fa mahatsiaro azy ireo ary izy ireo mivavaka ho antsika.

Tsara ny hahalalantsika fa misy fiafarany izao tontolo izao fa amintsika Kristianina kosa tsy fiafarana ny fahafatesana fa varavarana, izay ambaran'ny varavarana masina amin'izao taona famindrampo izao.

Manararaotra aho mampianatra atsika hiroso amin'ny lalindalina kokoa amin'ny fanaovana fivahiniana masina fa indrindra efa ho herinandro sisa dia hamarana ny fankalazana ny taona masina isika. Tsarovy anefa fa ny fankalazana ihany no faranantsika fa ny fiainana an'izany taona masina izany, ny fiainana ny famindrampo dia mitohy mba hanjaka ny famindrampon'Andriamanitra, ny fifamelan-keloka eto amintsika ka amin'izay tsy ho hisy ireo fahafatesana nolazaintsika fa i Kristy izay ankalazaintsika amin'ny Alahady hoavy famaranana ny taona litorjika, izy izay Kristy Mpanjaka anie no hanjaka eo amin'ny fiainantsika. Tsy mpanjaka araka ny fiheveran'izao tontolo izao izy ka manjakazaka sy mpamono an'izay tsy mitovy hevitra aminy fa mpanjaka mpanompo izy ary ao anatin'ny fanompoana no tena hanjakan'ny fifankatiavana. Raha manjaka ny fifankatiavana dia ny fiadanana no hanjaka eo anivon'ny fiainantsika.

Tsy mahagaga raha ny hetraketraka isankarazany, ny herisetra no manjaka eo amin'ny fiainantsika na eo amin'ny tanàna misy antsika satria tsy mbola manjaka Andriamanitra na i Kristy eo amin'ny fiainantsika. Fantantsika fa tsy maintsy misy safidy mazava hatao raha ny amin'ny fampanjakana an'i Kristy eo amin'ny fiainantsika. Izany no tian'ny Eglizy hibanjinintsika amin'izao manakaiky ny famaranana ny taona litorjika izao dia ny manambara fa misy fiafarana tokoa izao tontolo izao ary i Jesoa no hitsara atsika. Ho avy ny farandro nefa tsy tokony hampatahotra izany raha haintsika amin'ny fiainantsika ny mitoetra ao amin'i Kristy sy miaraka ary amin'ny alalany fa raha tsy izany dia mety mampatahotra tokoa.

Amin'ny Evanjely androany (*Lk. 21, 5-19*) : antitranterin'i Jesoa fa raha maharitra isika mifikitra aminy sy mitoetra ao aminy ny fiainantsika na hirodana aza izao tontolo izao dia hahatoky azy tsy hatahotra fa afaka hiroso amin'izany fiainana misy an'Andriamanitra izany dia ny fiainan-koavy. Na dia misy aza ny ady sy ny zavatra manahirana rehetra, aoka isika hifikitra amin'i Kristy fa izany no famonjena ho antsika.

Tsara koa ny mampahafantatra atsika ny farandro : betsaka ny filazana henontsika mikasika an'io satria misy aza milaza mihitsy ohatra tamin'ny taona 2013, misy koa milaza fa amin'ity taona 2016. Noho izany aoka hifikirantsika ny tenin'Andriamanitra ao amin'i Kristy ary izay no amaranan'i Kristy amin'ny fampianarany androany dia ny FAHARETANA. Fantaro fa tsy misy mahafantatra an'izany fotoana sy ora izany na ny Zanak'olona aza. Aoka isika tsy handray na hanaiky ireny fitapitaka sy lainga samihafa ireny, ohatra ao ny milaza fa rehefa misy eklipsa dia farandro. Ny tena fototra dia izay nolazain'i Jesoa io dia ny hifikirantsika aminy.

Tsy maintsy misy farany izao tontolo izao ary tsy maintsy misy ny fitsarana izay midika fa misy fanavahana izany ka aoka isika mba hifikitra amin'i Kristy. Mitaky safidy izany fa indrindra amin'izao

famaranana ny taona masina izao, aoka isika hiditra amin'ny varavarana masina izay manambara ny finoantsika. Izay mbola misalasala aoka hanatona ny Eglizy izy ka hiditra amin'ny varavarana masina izany.

Ny hanambarana fa tena mifikitra amin'i Kristy isika ka tsy matahotra ny farandro dia ny anatra ataon'i Md Paoly tamin'ny vakiteny faharoa (2 Tes. 3, 7-12) : “Aoka isika hiasa bebe kokoa, izay tsy miasa aoka tsy hihinana”. Ny asa dia tsy ozona vokatry ny fahotana fa anisany maha olona atsika ary manomana atsika amin'ny fiainana mandrakizay. Tsy ny asa no ratsy fa ny fomba fanatanterahantsika sy hivelomantsika azy no tsy maintsy hodinihana tsara.

Izay koa no ananaran'i Malakia mpaminany atsika mba tsy hiandry lava fa hivelona kosa anatin'ny fahamarinana izay tanamasoandro ho antsika ka hahafahantsika miroso lalindalina kokoa. Raha marina tokoa isika dia olon-kendry izay mikatsaka mandrakariva ny hanasoa ny hafa ary izany no hivelomana ny tena fiadanana marina.

Ry Kristianina havana izao famaranantsika ny taona masina izao ary amin'ny Alahady ho avy isika dia hankalaza an'i Kristy Mpanjaka, enga anie mba hivelona bebe kokoa an'izay taona masina izay isika ka hampanjaka an'i Kristy eo anivon'ny fiainantsika. Matoa ny Papa nisafidy famaranana ny taona masina amin'ny fetin'i Kristy Mpanjaka dia misy dikany lehibe satria manambara fa i Kristy Endriky ny famindrampon'Andriamanitra no manjaka eo amin'ny fiainantsika ka noho izany ny tarehin'i Kristy no tarehin'Andriamanitra izany hoe tarehin'ireo namantsika no tarehintsika ihany koa. Tsy misy olona hanaratsy ny tarehiny fa hanatsara mandrakariva ka ny famaranantsika ny taona masina dia maniraka atsika hanatsara bebe kokoa ny fiainana ny famindrampo eo amin'ny fiainantsika andavanandro. Koa enga anie izany tokoa no entintsika hivelona ny fiheverantsika ny farandro ka amin'izay tsy hampatahotra atsika satria efa zatra mahita ny tarehin'Andriamanitra isika amin'ny alalan'ireo tarehin'ireo namantsika ka na dia misy aza ny fitsarana dia ny famindrampom'Andriamanitra izany hoe ny fitiavana nivelomantsika no hitsarana atsika ka tsy hampatahotra atsika an'ireo ady sy hotrakotraka maro isankarazany ary horohorontany izay re etsy sy aroa fa hanampy atsika kosa hahatsapa an'izay tena fitavana izay.

Ry Jesoa Kristy Tompo ô, fantatray tokoa fa ho hisy ny fiafaran'izao tontolo izao indray andro any fa irinay kosa dieny izao dia ianao no hanjaka amin'ny fiainanay, amin'ny taninay sy hanjaka amin'ny Madagasikara mba ho fihavanana, fitiavana fahasambarana no hanenika ny fiainanay.

Enga anie amin'izao famarananay ny taona masina izao, hahay hiroso amin'ny lalindalina kokoa izahay amin'izany fiainana ny famindrampo izany amin'ny alalan'izay rehetra ataonay eo amin'ny fiainanay andavanandro araky ny fampianarana ataon'i Md Paoly milaza hoe : “Enga anie ny asa ataonay no hanamasinanay ny fiainanay ao aminao”. Amen

Mompera Arseveka Mgr Benjamin Ramaroson